

26403

4



後趙錄四

春秋卷第十四

魏

散騎常侍

崔

鴻

撰

石弘

石弘字大雅勒之第二子也幼有孝行以恭謹
自守受經於杜嘏誦律於續咸勒曰今世非承
平不可專以文業教也於是使劉徵任潘授以
兵書王陽教之擊刺立爲世子領中領軍尋署
衛將軍使領開府辟召後鎮鄴勒僭位立爲太
子虛襟愛士好爲文詠其所親昵莫非儒素勒

謂中書令徐光曰大雅悒悒殊不似將家子光曰漢祖以馬上取天下孝文以玄默守之聖人之後必有勝殘去殺者天之道也勒甚悅光因說曰皇太子仁孝溫恭中山王雄暴多詐陛下一旦不諱臣恐社稷非太子所有也宜漸奪中山王威權使太子早參朝政勒納之左僕射程遐言於勒曰中山王勇悍機畧羣臣莫及觀其志度自陛下之外視之蔑如無以專征歲久威振內外性又殘賊安忍無賴諸子並長皆預兵

權陛下在自當無他恐其快快不可輔少主也宜早除之以便大計勒曰今天下未平兵難未已大雅中幼宜任疆輔中山王佐命功臣親同魯衛方當委以伊霍之任何至如卿所言也卿正恐輔幼主之日不得獨擅帝舅之權爾吾亦當參卿於顧命勿過懼也遐泣曰臣所慮者至公陛下乃以私計拒之豈明主開襟納說忠臣必盡之義乎中山王雖爲皇太后所養非陛下天屬不可以親義期也仗陛下神規微建鷹犬

之效陛下酬其父子恩榮亦已足矣而志願無極魏任司馬懿父子終於鼎祚淪移以此而觀中山豈將來有益者乎臣因緣多幸託瓜葛於東宮臣而不竭言於陛下更誰言之陛下若不除中山臣已見社稷不復血食矣勒不聽遐退告徐光曰主上向言如是太子必危將若之何光曰中山王常切齒於吾二人恐非但國危亦將爲家禍當爲安國寧家之計不可坐而受禍也他日光復乘間言於勒曰陛下廓平八州帝

有海內而陛下神色若有不怡者何也勒曰今吳蜀未平書軌不一司馬家猶不絕于丹陽吾恐後世謂吾不應符籙不以吾爲受命之主每一思之不覺見於神色光曰臣以陛下爲憂腹心之患而何暇更憂四支乎何則魏承漢運爲正朔帝王劉備雖紹興巴蜀亦不可謂漢不滅也吳雖跨據江東豈有虧魏美陛下包括二都平蕩八州彼司馬家兒復何異玄德李氏亦猶孫權帝王之統不在陛下竟欲安歸此四支之

輕患爾中山王藉陛下指授神畧所向輒克天下皆言其英武亞于陛下兼其殘暴多姦見利忘義無伊霍之忠父子竝據權位勢傾王室觀其耿耿常有不滿之心近于東宮侍讌有輕皇太子之色陛下隱忍容之臣恐陛下萬年之後宗社必生荆棘此腹心之重疾也惟陛下圖之勒默然而竟不從及勒死虎執太子弘使臨軒收程遐徐光下廷尉召其子遂將兵入宮宿衛文武靡不奔散弘大懼自陳劣弱不堪重寄乃

讓位于虎虎曰君薨而世子立理之常也臣安敢奸之弘涕泣固讓虎怒曰若其不堪重任天下自當有大義何足預論遂以晉咸和八年逼立之大赦改元曰延熙文武百僚進位一等誅程遐徐光八月弘策拜虎爲丞相魏王大單于加九錫以魏郡等十三郡爲國總攝百揆虎僞固讓久乃受命赦其境內殊死已下立妻鄭氏爲魏王后子遂爲魏太子加使持節侍中大都督中外諸軍事大將軍錄尚書事次子宣爲使

持節車騎大將軍冀州刺史封河間王韜爲前
鋒將軍司隸校尉封樂安王遵齊王鑒代王苞
樂平王徙太原王斌爲章武王勒文武舊臣皆
補左右丞相間任虎之府僚舊昵悉署臺省禁
要更命太子宮曰崇訓宮勒妻劉氏已下皆徙
居之簡勒宮人美淑及車馬珍寶服御之上者
皆入丞相府署鎮軍將軍夔安領左僕射尚書
郭殷爲右僕射劉氏與彭城王堪密謀堪請出
兗州據廩丘挾南陽王恢爲盟主宣太后詔討

虎事洩虎多殺堪徵恢還襄國因廢劉氏尋逼
殺之尊弘母程氏爲皇太后冬十月河東王生
鎮關中朗鎮洛陽起兵于二鎮以討丞相虎生
自稱秦州刺史遣使降晉虎留子邃守襄國統
步騎七萬攻朗于金墉城潰獲朗刖而斬之進
攻長安以挺爲前鋒大都督生遣將軍郭權率
鮮卑涉瓚部衆二萬爲前鋒拒之生統大軍繼
發次于蒲阪權與挺戰于潼關敗績挺及丞相
左長史劉隗皆死虎退奔澠池枕屍三百餘里

鮮卑密通于虎背生而擊之生時停蒲阪不知
挺已死懼單馬奔長安郭權復收衆三千與鎮
西將軍越騎校尉石廣相持于渭泃生遂去長
安潛於鷄頭山將軍蔣英據長安拒守虎聞生
之奔也進師入關遂攻長安旬餘拔之斬蔣英
等徙秦州華戎十餘萬戶於關東生部下斬生
以降權奔隴右虎分遣諸將屯于汧隴遣將軍
麻秋討蒲洪洪率戶二萬迎降虎拜洪光烈將
軍護羗校尉洪至長安說虎宜徙關中豪傑及

氏羗內實京師虎從之徙雍秦民及氏羗十餘
萬戶于關東以洪爲龍驤將軍流民都督使居
枋頭以羗帥姚弋仲爲奮武將軍西羗大都督
使帥其衆徙居清河之灃頭虎還襄國大赦諷
弘命已建魏臺一如魏武輔漢故事十二月郭
權以生敗據上邽歸晉

延熙二年春正月晉成帝詔以郭權爲鎮

一作征

西將軍秦

一作雍

州刺史

于是京兆新平扶風馮

翊北地皆起兵應之弘鎮西將軍石廣復與權

戰敗績三月虎遣將軍郭敖及子章武王斌等
率步騎四萬討權于郿次于華陰夏四月上邽
豪族殺權以降徙秦州三萬餘戶于青并二州
諸郡南羗氏楊難敵等送任通和長安人陳良
夫奔黑羗招誘北羗四角王簿句大等侵擾北
地馮翊與章武王斌相持樂安王韜等率騎倚
句大之後與斌夾擊敗之句大奔馬蘭山郭敖
等乘勝追擊懸車深入爲羗所敗死者十有七
八斌等收軍還于三城虎聞而大怒遣使殺郭

敖秦王宏頗有怨言虎幽之于別室冬十月弘
自齋壇綬親詣魏宮論禪位之意虎曰帝王大
業天下自當有議何爲自論此耶弘流涕還宮
對太后程氏曰先帝種真無復遺矣于是尚書
奏魏臺請依唐虞禪讓故事虎曰弘愚暗居喪
無禮不可以君臨天下一作君便當廢之何禪

讓也十一月遣郭敖持節入宮廢弘爲海陽王
弘安步就車容色自若謂羣臣曰庸昧不堪纂
承大統顧慙羣后此亦天命去矣又何言百官

莫不流涕宮人慟哭羣臣皆詣魏臺請進虎曰
皇帝者盛德之稱非所敢當且可稱居攝趙天
王遂以晉咸康元年幽弘及太后程氏并秦王
宏南陽王恢於崇訓宮未幾密遣人賊殺之是
時西羌大都督姚弋仲稱疾不賀虎累馳召之
及至正色謂虎曰弋仲常謂大王命世英雄柰
何把臂受托而返奪之耶虎曰吾豈樂此哉顧
海陽年少恐不能了家事故代之爾心雖不平
然察其誠實亦不之罪也弘在位二年時年二

十二

就李 項琳之
屠喬孫 同訂

春秋卷第十四

射尤善彈數彈人爲軍中患勒怒之白母王氏曰此兒克暴無度一作頓使軍人殺之聲名可惜

不若自除之勒母曰健犢走車破轅良馬須逸

鞭汎駕然後能負重致遠且當小忍勿便殺也

一云快牛爲犢子小時多能破車爲復小忍勿却之至年十八稍檢攝恭

謹嚴重愛士身長七尺五寸趨捷便弓馬勇冠

當時至於降城陷壘不復別斷善惡坑斬士女

鮮有遺類勒雖屢加誨責而行意自若然御衆

甚嚴莫敢犯者指授攻討所向無前故勒寵信

隆委以專征之任所在立功將佐親戚莫不

敬憚勒深嘉之拜征虜將軍性尤酷虐所爲無

道軍中有勇幹策畧與已齊者因獵戲輒以事

害之前後所殺甚衆勒之居襄國劉聰以虎爲

魏郡太守鎮鄴三臺後封繁陽侯食邑三千戶

勒卽大單于趙王位署爲單于元輔都督禁衛

諸軍加侍中開府進封中山公及勒僭稱尊號

授太尉守尚書令進封中山王食邑萬戶虎自

以勲高一時謂勒卽位之後大單于必在已而

以勲高一時謂勒卽位之後大單于必在已而

更以授其子弘乃深恨之私謂其子遂曰主上
自都襄國以來端拱指授以吾身當矢石二十
餘年南擒劉岳北走索頭東平齊魯西定秦雍
剋殄十有三州成大趙之業者我也大單于之
望當以授我今乃以與黃吻小兒一作兒每一憶
此令人氣塞不能寢食待主上晏駕之後不足
復留種也

建武元年春正月虎廢勒子弘羣臣已下勸其
稱尊號虎下書曰王室多難海陽自棄四海任

重故俛從推逼朕聞道合乾坤者稱皇德協人

神者稱帝皇帝之號非所敢稱

一作聞

且可稱居

攝趙天王以副天人之望于是大赦境內殊死

已下改元建武以夔安爲侍中太尉守尚書令

郭殷爲司空韓晞爲左僕射魏槩馮莫張崇曹

顯爲尚書申鍾爲侍中郎闔爲光祿大夫王波

爲中書令自餘文武封拜各有差立子遂爲太

子虎以讖文天子當從東北來于是備法駕行

自信都而還以應之分瘦陶之柳鄉立停駕縣

又分司州之河南河東弘農滎陽兗州之陳留
東燕爲洛州又改陳留郡爲建昌郡屬洛州虎
諱言勒呼馬勒曰嚮羅勒曰香萊時徐州從事
蘭陵朱縱殺刺史郭祥以彭城歸晉虎遣將軍
王朗討一作擊之縱奔淮南虎荒淫廢政外耽管
繕使太子遂省可尚書奏事選牧守祀郊廟惟
征伐刑斷乃親覽之鸛雀臺崩殺典匠少府任
汪復使修之倍于常度夏四月癸卯虎率衆南
遊至臨江而還有游騎十餘疋至歷陽歷陽太

守袁耽甚懼表聞于晉不言騎多少京師大震
遣司徒王導加大司馬假黃鉞都督征討諸軍
事以禦之癸丑晉帝觀兵于廣莫門分命諸將
遣將軍劉仕救歷陽平西將軍趙胤屯慈湖龍
驤將軍路末戍牛渚建武將軍王允之戍蕪湖
司空郗鑒使廣陵相陳光帥衆衛京師俄聞趙
騎至少又退向東陽戊午解嚴遂以桓宣爲都
督江沔前鋒征討諸軍事平北將軍司州刺史
假節鎮襄陽虎後遣征虜將軍石遇率騎七千

渡沔寇中廬圍桓宣于襄國輔國左將軍毛寶
南中郎將王國征西司馬王愆期等率荊州之
衆來援屯于章山遇三面爲地窟攻城宣募精
勇出其不意殺傷數百多獲鎧馬攻守二旬遇
軍饑疫不克而還宣遣步騎收南陽諸郡百姓
陷沒者八千餘人詔以宣爲南陽襄陽新野南
鄉四郡諸軍事梁州刺史毛寶爲征虜將軍戍
邾城虎以租入殷廣轉輸勞煩令中倉歲入百
萬斛餘皆儲之水次晉將軍淳于安攻琅邪費

縣俘獲數千人虎下書令刑贖之家得以錢代
財帛無錢聽以穀麥皆隨時價輸水次倉秋八
月冀州八郡雨雹大傷秋稼穀價騰貴銀一斤
值米二斗下書深自咎責遣御史所在發水次
倉麥以給秋種尤甚之處差復一年鶴雀臺成
賜匠各有差九月虎遷都鄴宮尚書請太常告
廟虎曰古者將舉大事必告宗廟而不列社稷
尚書可詳議以聞公卿乃請使太尉告社稷從
之時自去年至九月十一月不雨及入鄴宮澍

雨周洽虎大悅赦殊死已下始制散騎常侍已
上得乘輅軒王公郊祀乘副車駕四馬龍旂八
旒朔望朝會節乘輅軒冬十月羗薄句大猶保
險未服遣子章武王斌帥精騎二萬并秦雍二
州兵討平之虎如長樂衛國有田疇不闢桑業
不修者貶其守宰而還是年奉天竺佛圖澄於
鄴城

建武二年春正月使牙門將張彌徙洛陽鍾虞
九龍翁仲銅駝飛廉于鄴虎大悅爲之赦二歲

刑賚百姓穀帛百官爵一級下書曰三載考績
黜陟幽明斯則先王之令典政事之通塞魏始
建九品之制三年一清定之雖未盡弘美亦縉
紳之清律人倫之明鏡從爾以來遵用無改先
帝創臨天下黃紙再定至于選舉銓爲首格自
不清定三載于茲主者其更銓論務揚清激濁
使九流咸允也吏部選舉可依晉氏九班選制
未爲揆法選舉經中書門下宣示三省然後施
行之其著此詔書于令銓衡不奉行者御史彈

坐以聞冬十一月索頭郁鞠率衆三萬來降虎
署郁鞠等十三人爲親通趙王皆封列侯散其
部衆于冀青等六州時衆役煩興軍旅不息加
以久旱穀貴百姓饑饉野無生草金一斤直米
二斗銀一兩斤一作直肉一斤流亡死者十有六
七百姓嗷然無所生賴或掘野鼠捕螿鷲而食
之虎使令長率丁壯隨山澤採橡一作捕魚以
濟老弱而復爲權豪所侵人無所得又料殷富
之家配饑人以食之公卿已下出穀以助賑給

效吏因之侵奪無已雖有貸贍之名而無其實
先是孟津河東去鄴城五里有濟北郡穀城縣
穀城山是黃石公所葬處有人登此山見崩土
中有文石石文鮮明詣鄴獻之使採取以治宮
殿遂免穀城令以不奏聞故也虎大起宮殿于
鄴都遂于鄴西文昌故殿處造東西大武二殿
採穀城山文石爲基一基下五百武直宿衛屈
柱跌瓦悉鑄銅爲之金漆圖飾焉又徙長安雒
陽銅人置諸宮前以華其國城之西北有三臺

皆因城爲基巍然崇舉其高若山又建九華宮
以三三爲位謂之九華

沈約詩曰徘徊九華宮卽此宮也

北建

逍遙樓東北建披雲樓城門上建玳瑁樓純用
金銀裝飾懸五色珠簾白玉鈎帶內有瑜石床
以玳瑁爲龜甲文鋪以十色錦繡故名玳瑁樓
其大武殿懸紫綬于梁柱綬玉璧于綬又造東
西宮鄴宮南面三門西鳳陽門高二十五丈上
有層樓向陽安金鳳凰二頭于其上鎮之其頭
高一丈六尺東城上立東明觀觀上加金博山

謂之鏘天北城上有齊午樓超出羣榭孤高特
立其城東西七里南北五里飾表以埴百步一
樓凡諸宮殿門臺隅雉皆加觀榭層甍疊宇飛
檐拂雲圖以丹青色以輕素門窓戶宇朱柱白
壁未到鄴城六七十里遙望若亭便見此門巍
若仙居鄴城東門石橋有兩石柱製作精妙柱
側悉鏤雲炬上作蟠螭甚有形勢信爲巧工大
武殿基高二丈八尺以文石綵之

一作秋毫以文石下穿

伏室置衛士五百人于其中東西七十五步南

北六十五步皆以漆灌瓦金鍤銀楹珠簾玉璧窮極伎巧又于大武殿前起樓高四十丈結珠爲簾垂五色玉珮風至鏗鏘和鳴清雅盛夏之時登高樓以望四極奏金石絲竹之樂以日繼夜于樓下開馬埒射塲週迴四百步皆文石丹沙及彩畫于埒旁聚金玉錢貝之寶以賞百戲四廂置錦幔屋柱皆隱起爲龍鳳百獸之形雕琢衆玉以飾楹柱夜中往往有光明集諸羗氏于樓上或時亢旱春雜寶異香爲屑使數百人

于樓上吹散之名曰芳塵臺上有銅龍腹可盛數百斛酒使胡人于樓上喫酒風至望之如露名曰粘雨臺引以灑塵樓上戲笑之聲音震鄴中又造梁馬臺一名笑馬臺一名戲馬臺一名閱馬臺在城中漳水之南約次爲臺基高五丈列觀其上虎常于此臺練簡騎卒武牙宿將雲騰黑稍騎五千每月朔晦閱馬于此臺虎每講武于其下升觀以望之乃于漳水之南張幟鳴鼓列騎星羅虎登臺射髀箭一發

五字水經作放鳴鏑之矢

五千騎一時奔走從漳水之南齊至于臺下隊
督以下皆有班賚虎又射一箭五千騎又一時
奔走至于漳水之北其五千流散攢促若數萬
人騎皆以黑稍從事故以黑稍爲號又以介羽
漆砂卽名鬪鷄臺以鬪鷄爲戲其北有臨漳宮
東有求樂宮西有黎園宮東南有赤橋宮西北
有紫陌宮又有御龍宣武凌霄如意四觀皆虎
遊獵燕息之所又有聖壽堂用玉珂八百具抱
桂丁香末以塗壁胡桃油以塗瓦垂金鈴萬餘

箇若微風至則聲聞十餘里又于銅雀臺更增
二丈立一屋連棟接檐彌覆其上盤迴隔之名
曰命子窟又于屋上起五層樓高十五丈去地
二十丈又作銅雀于樓巔舒翼若飛南列金雀
臺高八丈有屋一百九間北曰井冰臺亦高八
丈有屋百四十間上有冰室室有數井井深十
五丈冬月藏冰三伏之日以冰賜大臣及藏石
墨石墨可書又燃之難盡亦謂之石炭又有粟
窖及監以備不虞今窖上猶有石銘存焉又起

靈風臺九殿于顯陽殿後選百官州郡民女以充之又于正會殿南面臨軒殿上施白玉床流蘇帳皆竊擬禮制整法服冠通天佩玉璽玄衣纁裳畫日月火龍黼黻華虫粉米改車服着遠遊冠臨軒大會着丹紗袍獵着金縷合歡袴改虎頭鞞囊爲龍頭鞞囊又改直盪冠爲龍騰冠以絳幘于襄國又作金華殿殿前有白龍鑄作金龍于東廂西向龍口又安玉盤受玉十斛又安金博山蟬翼單紗裏服天曉行禮公執圭卿

執羔大夫執雁士執雉一如舊禮充庭車馬四月八日九龍啣水浴太子之象大武殿前溝水注之浴時溝中先安銅龍以疏其水相去六七步注之斷水又安銅龜飲穢水出後脚下入諸公主第溝水亦出建春門又有皇后浴室三間徘徊側宇櫺櫺隱起雕彩刻鏤極盡粲麗室中臨池上有石床別爲浴臺有四時浴室皆用瑜石瑛珞爲堤岸或以琥珀車渠爲瓶杓夏則引外溝水以納于池池中皆以紗縠爲囊盛百雜

香漬于水底或用葛爲囊嚴冰之時作銅屈龍
數千枚各重數十斤燒如火色投于水中則池
水恒溫引浴室中名曰燠龍溫池又用文錦步
障縈蔽浴所與宮人寵嬖者解媠服宴戲彌于
日夜名曰清嬉浴室浴罷洩水于宮外水流之
所名溫香渠渠外之人爭來汲取得升合以歸
其家人莫不怡悅浴室中種二長生樹枝條交
于棟上團團作車蓋形冬日不凋葉大如掌至
八九月乃生華花色白子赤大如橡子不中啖

也世人謂之西王母長生樹又安樂帶十斛于

二樹之間冬月施蜀

一作熟

錦流蘇斗帳又用明

光錦以白縑爲裏名曰複帳帳之四角安純金
銀鑿鏤香爐蕤以百和香安金蓮花以冠帳頂
帳之四面皆作十二章相采色耀爛又作沉一作

流

蘇帳帳頂亦安金蓮花花中懸金薄織成綻

囊裹受三升以沉香注帳之四面上有十二香
囊彩色亦同又安純金龍頭銜五色沉蘇或用
黃綈博山文錦或用紫綈及大小明光錦大約

春秋施錦帳表以五色絲爲被帳夏用單紗羅
或棊文單羅或穀文羅爲單帳織錦羅在中尚
方三署皆數百人錦有大登高小登高大明光
小明光大博山小博山大茱萸小茱萸大交龍
小交龍葡萄文錦班文錦鳳凰錦朱雀錦韜文
錦桃核文錦其御芻有豹頭文芻鹿子芻花芻
或青緋或白緋或黃緋或綠緋或紫緋或蜀緋
工巧百數不可盡名又作雲母五明金薄莫難
扇此一扇之名也薄打純金如彈翼二面彩漆

圖畫列仙奇異鳥獸其五明方中辟方三寸或
五寸隨扇大小雲母帖其中細縷縫其際雖掩
盡而彩色明徹看之如謂可取故名莫難也虎
出時常以此扇挾乘輿或用象牙及桃枝扇其
上或作綠沉色或作木蘭色或作紫紺色或作
鬱金色又作金銀鈕屈膝屏風衣以白縑畫文
人義士仙人禽獸之像讚者皆三十二言高施
則八尺下施則四尺或施六尺隨意所欲高下
文駕有金銀輦雲母輦數百乘皇后出乘高輦

或乘文武玉輅或乘朱漆卧輦以雲母代紗中外四梁皆通徹明亮虎正會上御食遊槃兩重皆金銀參帶百二十酸彫飾竝同其參帶之間葉萸盡微如被髮近看乃得見動遊帶則員轉也御床獨方三丈其餘床皆局脚高下六尺後宮別妾房中有小形玉床又有轉開床以射鳥獸其作褥周三丈用錦緣之作席以錦雜以五香施以五彩綫編蒲皮緣之名五彩席所以祭天御坐几悉雕漆畫皆爲五彩色又有三人臺

及宮內中鏡有徑二三尺者純金蟠龍雕飾又有大小鏡二萬餘枚又爲曲鏡又以胡粉和椒塗壁名曰椒房後庭服綺縠玩珍奇者萬餘人內置女官十有八等教宮人星占及馬步射置女太史于靈臺仰觀災祥以考外太史之虛實禁郡國不得私學星識敢有犯者斬正會置三十部女鼓吹三十步輦置一部一部十二人皆在平閣上去地丈餘又置女尚書官屬皆着紫袴佩玉羽儀雜伎工巧皆與外伴正會殿前作

樂高組龍魚鳳凰安息五案之屬莫不畢備額
上緣橦至上鳥飛左回右轉又以橦着口齒上
亦如之設馬車立木橦其車上長二尺橦頭安
兩木伎兒各坐木一頭或高飛高一或倒掛又
依伎兒作獼猴之形走馬上或在脇或在頭或
在尾馬走如故名爲猿騎有二銅駝如馬形長
一丈高一丈足如牛尾長二尺脊如馬鞍在中
陽門外夾道相向銅鐘四枚如鐸形高二丈八
尺大面廣一丈二尺小面廣七尺或作蛟龍或

作鳥獸繞其上又宮妓數千人盡着皂構頭着
神弁如今之禮賢冠也虎左右置直衛萬人皆
着五色細鎧光耀奪目虎與皇后出常以女騎
一千爲鹵簿冬日皆着紫綸巾織熟錦袴腰中
皆着金銀鏤帶手持雌黃宛轉角弓脚着五彩
織成鞞隨時遊于戲馬臺一作觀虎與皇后在臺
上有詔書以五色紙着鳳凰口中鳳旣銜詔侍
人放數百丈緋繩轆轤迴轉狀若飛翔飛下端
門鳳以木作之五色文身脚皆用金每年三月

十六國春秋卷之五 三十五
三日虎及皇后會公主妃主者家婦女無不畢
出臨水施設帳幔車服燦爛走馬步射飲宴終
日又令左校令成公段造庭燎于崇杠之末高
十餘丈上盤置燎下盤置人絙繳上下虎試而
悅之正會殿庭中端門外及閭闔門前設百二
十枚燈以鐵爲之高皆一丈六尺是年魏烈帝

諱繫槐 出居於鄴虎奉第宅伎妾奴婢什物

建武三年春正月庚辰太保夔安等文武五百
九人勸虎上皇帝尊號安等方入庭燎油灌下

盤死者二十餘人虎惡之腰斬成公段于閭闔
門辛巳虎依殷周之制稱大趙天王初虎衣袞
冕將祀南郊照一大鏡不見其首乃大恐怖遂
不敢稱皇帝自貶爲王至是又僭稱大趙天王
卽位于南郊大赦境內殊死已下追尊祖芻邪
爲武皇帝父寇覓爲太宗孝皇帝立后鄭氏爲
天王皇后太子邃爲天王皇太子諸子爲王者
皆貶封郡公宗室爲王者降爲縣侯百官封署
各有差太原徙人有一一作五百餘戶叛入黑羗

武鄉長城徙人韓強獲玄玉璽方四寸七分龜
 鈕金文詣鄴獻之拜強騎都尉復其一門使人
 採藥于華山上得玉版一枚其色黑文曰歲在
 申酉不絕如綫歲在壬子真人乃見虎以為應
 符之兆大悅夔安等又勸進曰臣等謹案大趙
 水德玄龜者水之精也王者古之寶也分之數
 以象七政寸之紀以準四極昊天威命不可久
 違輒下史官擇吉日具禮儀謹昧死上皇帝尊
 號虎下書曰過相褒美猥見推逼覽增慙然非

所望也其亟止茲議今東作告始自非京城內
 外皆不得表慶中書令王波上玄璽頌以美之
 虎以石弘時造此璽強遇而獻之太子邃既總
 百揆淫虐無道河間公宣樂安公韜皆有寵于
 虎邃疾之如仇虎又荒耽內遊威刑失度邃以
 事為可呈呈之虎恚曰此小事何足呈也時有
 所不聞復恚曰何以不呈誚責咎極月至再三
 邃甚恨之秋七月邃潛謀為逆乃稱疾不視事
 詳具遂傳虎聞邃有疾欲往視之先遣所親任女尚

書往察遠呼前與語抽劍擊之虎聞大怒收中
庶子李顏等誅之幽遠于東宮廢爲庶人其夜
殺遠并其妃張氏及男女二十六人合一棺埋
之宮臣支黨二百餘人皆伏誅廢遠母鄭氏爲
東海太妃立河間公宣爲天王皇太子宣母杜
昭儀爲天王皇后冬十一月乙丑太白犯歲星
于營室是年虎將李穆率騎五千送魏烈帝于
大寧其故部落多歸附之國人復奉烈帝爲代
王城盛樂而居之以其弟昭成帝什翼爲質於

趙

建武四年春正月虎將伐鮮卑段遼于遼西慕
有勇力者三萬人皆拜龍騰中郎會遼遣從弟
段屈雲襲幽州幽州刺史李孟退奔易京虎以
桃豹爲橫海將軍王華爲渡遼將軍統舟師十
萬出漂淪津支雄爲龍驤將軍姚弋仲爲冠軍
將軍統步騎十萬爲前鋒以伐段遼三月進次
金臺支雄前驅入薊段遼所署漁陽太守馬鮪
代相張牧上谷相侯龕等四十餘城並率衆來

降北平相陽裕帥其民千餘家登燕山以自固
雄攻安次斬其部大人那樓奇遼懼率妻子宗
族豪大千餘家棄令支奔密雲山遼左長史劉
羣右長史盧謀司馬崔悅等封其府庫遣使請
降虎遣將軍郭泰麻秋等帥輕騎二萬追遼及
之戰于密雲獲其母妻斬級三千遼單馬竄險
保於平崗遣子乞特真送表及獻名馬虎納之
遂入令支遷其戶二萬餘于雍司兗豫四州士
大夫之有才行者皆擢敘之先是北單于乙回

為鮮卑敵那所逐既平遼西遣其將李穆擊敵
那破之復立乙回而還虎入遼宮論功封賞將
士各有差陽裕詣軍門降即拜北平太守夏四
月初慕容皝與段遼有隙遣使稱藩于虎陳遼
宜伐請盡衆來會及軍至令支皝師不出虎以
皝不會兵攻遼而自專其利謀將伐之佛圖澄
曰燕福德之國未可加兵虎作色曰以此攻城
何城不克以此衆戰誰能禦之區區小豎何所
逃也太史令趙攬固諫曰燕地歲星所守行師

無功必受其禍虎怒鞭之出爲肥如長虎遣使
四出招誘民夷燕成周內史崔燾居就令游泓
武原內史一作令史常霸東夷校尉封抽護軍宋晃
等皆應之凡得三十六城戊子進逼棘城不拔
壬辰引退旣遣子恪率胡騎三千晨出挑戰諸
門皆若有師出者四面如雲虎大驚棄甲逃遁
惟游擊將軍石一作冉閔一軍獨全于是召趙攬
復爲太史令虎還自令支過易京惡其固而毀
之因謁石勒墓朝其羣臣于襄國建德前殿復

從征文武有差至鄴設飲至之禮賜俘徧于丞

郎以劉羣

一作臺

爲中書令盧湛爲中書侍郎蒲

洪以功拜使持節都督六夷諸軍事冠軍將軍
封西平郡公石閔言于虎曰蒲洪雄俊驍果其
諸子並非常才宜密除之虎不納待之愈厚虎
謀伐昌黎遣渡遼將軍曹伏將青州之衆渡海
戍蹋頓城無水而還因戍于海島運穀三百萬
斛以給之又以船三百艘運穀三十萬斛詣高
句驪使典農中郎將王典率衆萬餘屯田海濱

又令青州造船千艘以謀擊燕掠緣海諸縣所
在殺戮五月使太子宣率步騎二萬擊朔方鮮
卑斛摩頭破之斬首四萬餘級六月冀州八郡
大蝗司隸請坐守宰虎曰此政之失和朕之不
德所致而欲委咎守宰豈禹湯罪已之義耶司
隸不進諫言佐朕不逮而欲妄陷無辜所以重
吾之責也可白衣領司隸加子司徒韜金鉦黃
鉞鑿輅九旒虎使襄城公涉歸上庸公日歸率
衆成長安二歸告鎮西將軍石廣私樹恩澤潛

謀不軌虎大怒追廣至鄴殺之冬十二月段遼
自密雲山遣使詐降虎信之使征東將軍麻秋
率衆三萬百里郊迎勅秋曰受降如待敵將軍
慎之乃以尚書左丞陽裕遼之故臣使爲秋司
馬遼又遣使降于慕容皝曰胡貪而無謀吾今
請降求迎彼終不疑也若伏重軍以要之可以
得志皝遣慕容恪伏精騎七千于密雲山大敗
秋于三藏口死者十六七秋步走得免陽裕爲
燕所執虎聞秋敗驚怒方食吐哺削秋官爵是

時百姓因佛圖澄率多奉佛皆營造寺廟削髮
出家虎以真偽雜揉多往愆過乃下書問中書
令曰佛號世尊國家所奉閭里小人無爵秩者
應得事佛與否又沙門皆應高潔貞正行能精
進然後可爲道士今沙門甚衆或有奸宄避役
多非其人可料簡詳議真偽中書著作郎王度
等奏曰夫王者郊祀天地祭奉百神載在祀典
禮有常饗佛出西域外國之神功不施民非天
子諸華所應祠奉往者漢明感夢初傳其道惟

聽西域人得立寺都邑以奉其神其漢人皆不
得出家魏承漢制亦循前軌今大趙受命率由
舊章華戎制異人神流別外不同內享祭殊禮
華夏服禮不宜雜錯國家可斷漢人悉不聽詣
寺燒香禮拜以遵典禮其百辟卿士下逮衆隸
例皆禁之其有犯者與淫祀同罪其趙人爲沙
門者還從四民之服中書令王波同度所奏虎
以澄故下書曰度議云佛是外國之神非天子
諸華所可宜奉朕生自北鄙忝當期運君臨諸

夏至于饗祀應從本俗佛是我神所行兼奉夫
制由上行末世作則苟事允無虧何拘前代其
夷趙百姓有舍于淫祀樂事佛者悉聽爲道士
于是慢戒之徒因之以勵是年魏烈帝疾病命
諸大人迎昭成立之既卒諸大人梁蓋等以新
有大故昭成在遠來未可必比至之間恐生變
亂宜立長君以鎮衆望而烈帝次弟屈剛猛多
詐不如屈弟孤寬和仁厚乃相與殺屈而立孤
孤曰吾兄居長自應繼立吾安可越次而居大
遣之

業乃自詣鄴奉迎昭成請身留爲質虎義

項琳之

屠喬孫 同訂

春秋卷第十五

後趙錄六

業八自前漢末以平叔請長留為

散騎常侍 崔鴻撰

後趙錄六

春秋卷第十六

魏散騎常侍 崔鴻撰

石虎中

建武五年春正月虎下書令諸郡國立五經博士初勒置大小學博士于是復置國子博士助教虎以吏部選舉斥外者德而勢門童幼多為美官免郎中魏奩一作象為庶人夏四月辛未晉征西將軍庾亮遣叅軍趙松擊巴郡江陽獲蜀將李閔黃桓等又欲率眾十萬移鎮石城遣諸

軍羅布江河爲伐趙之規帝下其議時晉咸康
五年也丞相王導請許之太尉郗鑒以爲資用
未備不可大舉太常蔡謨議曰時有否泰道有
屈伸暴逆之寇雖終滅亾然當其強盛皆屈而
避之是以高祖受黜于巴漢忍辱于平城也若
爭強于鴻門則亾不終日故蕭何曰百戰百敗
不死何待原始要終期于大濟而已豈與當亾
之寇爭遲速之間哉夫惟鴻門之不爭故垓下
莫能與之爭文王身圯于姜里故道泰于牧野

句踐見屈于會稽故威伸于強吳今日之事亦
由此矣賊假息之命垂盡而豺狼之力尚強宜
抗威以待時或曰抗違待時時已可矣愚以爲
時之可否在胡之強弱胡之強弱在虎之能否
虎之能否可得而言也

一作矣

自勒初起虎常爲

爪牙百戰百勝遂定中原境土所據同于魏世
勒死之日將相內外悉欲誅之虎獨起于衆異
之中殺嗣主誅寵臣內難既定千里遠出一攻
而拔金墉再戰而斬石生禽彭彪殺石聰滅郭

權還據根本內外並定四方鎮守不失尺土詳
察此事豈能乎將不能也假令不能者爲之其
濟乎將不濟也胡前攻襄陽而不能拔誠有之
矣不信百戰之効而執一攻之驗棄多從少于
理安乎譬若射者百發而一不中可謂之拙乎
且不拔襄陽者非虎之身也桓平北守邊之將
爾賊一作胡前攻之爭疆場爾得之爲喜不得則
止非其所急也今征西之往則異于是何者重
鎮也名將也中國之人所聞而歸心也今而西

渡實有席卷河南之勢賊所大懼豈與桓宣同
哉虎必率其精兵身來拒戰若欲與戰戰何如
石生若欲城守守何如金墉若欲阻沔沔何如
大江蘇峻何如虎凡此數者宜詳校之愚謂石
生猛將關中精兵今征西之戰不能勝也金墉
險固劉曜十萬所不能拔今征西之守不能勝
也又是時兗州洛陽關中皆舉兵擊虎比今三
處反爲其用方之於前倍半之舉也昔石生不
能敵其半而征西欲當其倍愚所疑也蘇峻之

強不及虎沔水之險不及大江大江不能禦峻
而以沔水禦虎又所疑也昔祖士雅在譙佃于
城北慮賊來攻因以爲資故豫安軍以禦其外
穀將熟賊果至丁夫戰于外老弱穫于內多持
炬火急則燒穀而走如此數年竟不得其利是
時賊惟據沔北方之于今四分之一爾士雅不
能捍其一而征西欲禦其四又所疑也或云賊
若多來則必無糧然致糧之難莫過嶠函虎昔
涉此險深入敵國平關中而後還今至襄陽路

旣無險又行其國內自相供給方之于前難易
百倍前已經至難而謂今不能濟其易又所疑
也然此所論但說征西旣至之後爾尚未論道
路之虜也自沔以西水急岸高魚貫泝流首尾
百里若賊無宋襄之義及我未陣而擊之將若
之何今王士與賊水陸勢異便習不同寇若送
死雖開江延敵以一當千猶吞之有餘宜誘而
致之以保萬全棄江遠進以我所短擊彼所長
恐非廟勝之策也朝議同之故亮不果移鎮亮

弟懌時為輔國將軍梁州刺史假節鎮魏興遣
 牙門霍佐迎將士妻子佐驅三百餘口奔降于
 虎燕復遣別將來攻遼西虎以石成為鎮遠將
 軍帥積弩將軍呼延晃建威將軍張支等擊之
 晃支為燕所殺俘獲數千家而去秋七月虎以
 太子宣為大單于建天子旌旗八月以夔安為
 征討大都督統石鑿石閔李農張貉一作張賀
度下同
 李菟五將軍帥步騎五萬寇荆楊北鄙九月石
 閔敗晉師于沔陰殺將軍蔡懷夔安李農攻陷

沔南太子宣將朱保敗晉師于白石殺將軍鄭
 豹談玄郝莊隨相蔡熊等五人張貉攻邾城敗
 晉征虜將軍毛寶于邾西寶求救于庾亮亮以
 城固不時遣軍邾城遂陷死者萬餘人西陽太
 守樊峻與毛寶率左右突圍出走赴江溺死夔
 安進據胡亭因寇江夏晉義陽將軍黃冲歷陽
 太守鄭進以郡迎降安等進圍石城竟陵太守
 李陽拒戰安敗失首虜五千餘級乃潛師而退
 遂掠漢東擁七萬餘家遷于幽冀是時豪戚侵

恣賄託公行虎患之乃擢殿中御史李巨

一作李宸

為御史中丞特加親任自此百僚震懾州郡肅

清虎曰朕嘗謂良臣如猛獸高步通衢而豺狼

避路信矣哉李巨是也賞賜甚厚巨竟以疾卒

鎮遠將軍王擢表雍秦二州族望自東徙

一作簡

已來遂在戍役之所一作例既衣冠華胄宜蒙優

免從之自是皇甫胡梁韋杜牛辛等十有七姓

蠲其兵貫一同華族

華族一作舊族

隨才銓敘思欲還

桑梓者聽之其非此等不得為例冬十月以撫

軍將軍李農為使持節監遼西北平諸軍事征

東將軍營州牧鎮令支農率眾三萬與征北大

將軍張舉攻燕凡城虎以遼西迫近燕境數遭

攻襲乃徙其民于冀州之南十二月丁丑太保

桃豹卒

建武六年春二月虎將石成與慕容皝戰於遼

西大敗引歸夏六月大旱白虹經天自正月至

六月不雨虎遣太子宣詣臨漳溢口祈之久而

不降乃下書曰朕在位六載不能上和乾象下

濟黎元以致星虹之變其令百僚各上封事解
 西山之禁蒲葦魚鹽除歲供之外皆無所固公
 侯卿牧不得規占山澤奪百姓之利又下書曰
 前以豐國澠池二治初建徙刑徒配之權救時
 務而主遂為恒法致起怨聲自今犯罪流徒皆
 當申奏不得輒配也京獄見囚非手殺人一皆
 原遣又命佛圖澄自行祈雨俄有白龍降于祈
 所其日澍雨方數千里是年大收秋七月虎遺
 漢主李壽書欲與之連兵入寇約中分江南九

月尚書令夔安卒虎將討慕容皝命司冀青徐

幽并雍七州兼復之家五丁取三四丁取二合

鄴城舊軍滿五十萬具船萬艘自河通海運穀

豆千一百萬斛於樂安城以供一作備軍征之用

一作調徙遼西北平漁陽萬餘戶於兗豫雍洛四

州之地自幽州以東至白狼大興屯田以國內

馬少悉括取民馬有敢私匿者腰斬凡收百姓

馬四萬餘疋以入于公虎僭位之後有所調用

皆選司擬官經令僕而後行不得其人按為令

十六國春秋卷之七
僕之責尚書及郎不坐至是吏部尚書劉真以
爲失銓考之體上書言之虎怒責主者加真光
祿大夫金章紫綬虎如宛陽大閱于曜武塲冬
十月慕容皝襲幽冀幽州刺史石光擁兵數萬
閉城不出皝入自蠕蠕塞戍將當道者皆斬之
直抵薊城進破武遂津入高陽所至焚燒積聚
畧三萬餘家而去光坐懦弱徵還賜徵士辛謚
几杖衣服穀五百斛勅平原爲起甲第是月挹
婁國一名慎遣使通貢虎召其使而問之答曰

婁國

一名慎
肅氏

遣使通貢虎召其使而問之答曰

每候牛馬向西南眠者三年矣是知有大國所
在故重譯來云初李壽將李閔自晉來奔壽致
書請之題曰趙王石君虎不悅付外議之多有
異同中書監王波議曰今李閔以死自誓若得
返蒐蜀漢當鳩率宗族混同王化若遣而果也
則不煩一旅坐定梁益若有前却不過失一匹
命之夫爾于趙何損壽旣號竝日月跨僭一方
今以制詔與之彼必酬反取誚戎裔不若直書
答之因請以挹婁國所獻楛矢石弩遺壽曰使

其知我能服遐荒也虎從之於是遣閔歸報備
物以酬之閔既至蜀漢李壽欲誇其境內下詔
曰羯使來庭貢其方物虎聞之怒甚黜王波以
白衣領職虎以秦公韜爲太尉與太子宣迭日
省可尚書奏事專決刑賞不復啓白司徒申鍾
諫曰慶賞刑威后皇攸執名器至重不可假人
所以防微杜漸以示軌儀太子國之儲貳朝夕
共姑重請來云阿李壽欲誇其境內下詔
母到半黑向西南則皆三平矣長賦亦大國祖

頽之釁鄭有叔段之難此皆由寵之不道所以
亂國害親惟陛下覽之虎不從涼州牧張駿憚
虎之盛遣別駕馬詵來朝虎初大悅及覽其表
辭頗蹇傲由是大怒欲斬詵侍中石璞諫止之

詳具
璞傳

建武七年冬十月匈奴劉務桓入貢虎以務桓
爲平北將軍左賢王遣橫海將軍王華帥舟師
自海道襲燕安平破之又遣北中郎將始築盧
奴小城興起北榭立宮造殿

建武八年夏四月虎志在窮兵以國內馬少乃下令禁民畜馬匿者腰斬收百姓馬四萬餘疋以入公府秋七月虎大興宮室自襄國起閣道至鄴二百里中四十里輒一宮有一夫人侍婢數十黃門宿衛虎下輦卽止凡虎所起內外大小行宮夾道樹榆盛暑之月人行其下冬十二月作臺觀行宮四十餘所又營長安洛陽二宮作者四十餘萬人鄴城東七里有赤橋之宮勅河南四州治南伐之具并朔秦雍嚴西討之資

冀幽州爲東征之計皆三五發卒諸州軍造甲者五十餘萬人船夫十七萬人爲水所沒猛獸所食者三分居一無之公侯牧宰競興私利侵擾黎元庶民失業得農桑者十室而三貝丘人李弘因衆心之怨自言姓名應讖連結姦黨署置百僚事發誅之連坐者數千家虎馳獵無度晨出夜歸又多輕行射察作所侍中章諛諛曰臣聞千金之子坐不垂堂萬乘之主行不履危陛下雖天生神武雄據四海乾坤冥讚萬無

所慮者也然白龍魚服有豫且之禍海若潛游
罹葛陂之酷願陛下清宮蹕路思二神焉先登
不可忽天下之重輕行斤斧之間律有狂夫之
變龍騰之勇不暇施也智士之計豈及設哉又
自古聖王營建宮室未始不以三農之隙所以
不奪農時也今或盛功於耘藝之辰或煩役于
收穫之月頓斃盈途怨聲塞路誠非聖仁所忍
爲也昔漢明賢君也鍾離一言而德陽役止臣
誠識慙昔士言無可採陛下道越前王所宜哀

竟虎善之賜以穀帛而興繕滋繁游察自若秦
公韜有寵于虎太子宣惡之右僕射張離領五
兵尚書專總兵權一作欲求媚于宣因說之曰

今諸公侯吏兵過限宜漸削弱以壯儲威宣悅
其言使離奏奪諸公府吏秦燕義陽樂平四公
聽置吏一百九十七人帳下兵二百人自是以
下三分置一餘兵五萬悉配東宮於是諸公咸
怨嫌隙漸深矣遣征北將軍張舉自鴈門討索
頭郁鞠尅之課責征士五人出車一乘牛二頭

米各十五斛絹十匹諸役調有不辦者皆以斬
論將圖江表百姓窮窘率多鬻子以充軍須猶
不能給乃自經于道樹死者相望而求發無已
會青州上言濟南平陵城西北石虎一作一夕
忽移於城東南善石溝上有狼狐千餘迹隨之
迹皆成蹊虎大悅曰石虎者朕也自西北徙而
東南者天意欲使朕平蕩江南也天命不可違
其勅諸州兵明年悉集朕當親董六軍以奉天
命羣臣皆賀上皇德頌者一百七人時妖怪尤

多上黨孟門上有神人之象坐于山上三日而
去遣使以太牢祀之武鄉送雄虎變爲雌產一
狼子卽噬虎腦而殺之後三日狼子亦死石然
于泰山八日而滅東海有大石自立旁有血流
鄴西山石間血流出長十餘步廣二尺餘大武
殿初成圖畫自古聖賢忠臣孝子烈士貞女皆
變爲胡狀旬餘頭悉縮入肩中惟冠帔彷彿微
出虎大惡秘而不言佛圖澄對之流涕

建武九年夏五月虎帥衆伐慕容皝爲皝所敗

時晉建元元年也秋七月晉都督江荆等諸軍
事庾翼以滅胡取蜀爲已任遣使東約慕容皝
西約張駿刻期大舉朝議多以爲難惟車騎將
軍庾冰意與之同而桓溫等贊成之至是詔議
經畧中原翼欲悉衆北伐表桓宣督諸軍趨丹
水溫爲前鋒水督帥衆入臨淮竝爲所統虎汝
南太守戴開帥數千人奔降丁丑康帝詔曰慕
容皝摧珍羯寇乃云死沒八萬餘人將自其天
亾之始也中原之事宜加籌量且戴開已帥部

歸順宜加慰勞又檄石虎文曰石勒因釁前
覆舊京窮凶極逆僞號累祀百姓受灰沒之酷
王室有黍離之哀不爲少康之隆孰能祀夏不
有宣王之興誰克舊物羯帥石虎僭襲凶葉負
恃其衆陸梁河朔每念頽之士懷仁抱義食胆
飲血罹其禍酷心存倒懸而力不能奮今遣使
持節荊州刺史亭都侯翼高旗連雲組練映日
運孫吳之籌按尚父之畧莫不張膽咀鐵人恩
自奮以此衆戰其猶烈火之燔秋蓬衡飈之掃

落葉也八月太白犯歲星歲星在軫虎遣寧遠將軍劉寧攻武都狄道陷之太子宣討鮮卑斛穀提大破之斬首三萬級中謁者令申扁有寵于虎宣亦昵之扁聰辨明斷專掌機密之任虎既不省奏案太子宣荒酒內淫秦公韜沉酒好獵生殺拜除皆扁所決權傾內外刺史二千石多出其門九卿已下望塵而拜惟侍中鄭系王謙常侍盧諶崔約等十餘人與之抗禮虎又取州郡吏馬一萬四千餘疋以配曜武關將馬主

音復一年九月宇文逸豆歸執送段遼弟蘭來降并獻駿馬萬疋虎命蘭帥所部鮮卑五千人屯令支冬十二月虎以平西將軍張伏都爲使持節都督征討諸軍事帥步騎三萬擊涼州張駿伏都濟河與駿將謝艾戰于河西大敗而還虎雖昏虐無道而頗慕經學遣國子博士詣洛陽寫石經校中經於秘書國子祭酒聶熊注穀梁春秋列于學宮大司馬幽州牧燕公斌淫酒荒獵常懸管而入所聚羣兇因以肆虐征北將

軍張賀度嚴衛馳白之虎遣尚書張離持節召
斌鞭之三百免官歸第

建武十年春正月虎饗羣臣於太武前殿有白
鴈數百翔集馬道之南虎命射之皆不獲時諸
州兵集者百餘萬太史令趙攬密言於虎曰白
鴈集庭宮室將空之象也不宜南行虎信之乃
臨宣武觀大閱而解嚴復以燕公斌爲使持節
侍中大司馬錄尚書事置左右戎昭曜武將軍
位在左右衛上東宮置左右統將軍位在四率

上置上中光祿大夫位在左右光祿上置鎮位
將軍位在車騎將軍上二月遣使徵天水楊軻
軻少好易長而不娶學業精養徒從數百常食
麤飲水衣褐緼袍人不堪其憂而軻悠然自得
疎賓異客音旨未嘗交也雖受業門徒非入室
弟子莫得親言欲所論授須旁無雜人授入室
弟子令遍相宣授劉曜僭號徵拜太常固辭不
受曜亦敬而不逼遂隱於隴山勒旣禽曜秦人
東徙軻留長安至是虎備玄纁束帛安車徵之

不應親駕往視亦高卧不起迫之乃發既見不
拜與語不言命舍於末昌乙弟有司以軻倨傲
請從大不敬論虎不從下書任軻所向軻在末
昌虎每有饋餼輒口授弟子使爲表謝其文甚
美覽者嘆其有深致虎欲觀其真趣乃密令美
女夜以動之軻蕭然不顧又使人將其弟子盡
行遣魁壯羯士衣甲持刀臨之以兵并竊其所
賜衣服軻視而不言了無懼色常卧土牀覆以
布被裸寢其中下無茵褥潁川荀鋪好奇之士
也造而談經瞑目不答發軻被露其形大笑之
軻神體頽然無驚怒之狀於是咸以焦光之徒
未有能量其深淺也後上疏陳鄉思求還虎送
以安車蒲輪蠲十戶供之自歸秦州教授不絕
其後秦州兵亂軻弟子以牛負軻西奔爲戍軍
追禽遂爲所害夏四月涼州牧張駿遣將張瓘
攻王擢於三交城擢敗奔還太子宣淫虐日甚
莫敢以告領軍將軍王朗言于虎曰今隆冬雪
寒而皇太子使人斫伐宮材引于漳水功役數

萬士衆吁嗟陛下因出遊罷之虎如其言宣知
朗所爲怒欲殺之而無因會熒惑守房太史令
趙攬承宣旨言于虎曰昴者趙之分也熒惑所
在其主惡之房爲天子其殃不小宜以貴臣姓
王者當之虎曰誰可當者攬久而對曰無復貴
于王領軍也虎意惜朗且猜之曰更言其次攬
無以對因曰其次惟中書監王波爾虎乃下詔
追波前議楛矢事腰斬之并其三子投尸漳水
以厭熒惑之變尋愍波之無罪追贈司空封其

孫爲侯平北將軍尹農攻燕凡城不剋而還黜
爲庶人時大旱自正月不雨至六月又白虹出
自太社經鳳陽門東南連天十餘刻而滅虎下
書曰蓋古明王之理天下也政以均平爲首化
以仁惠爲先一作本故能允協人和緝熙神物朕
以眇薄君臨萬邦夕惕朝乾思遵古烈是以每
下書蠲除徭役休息黎元庶俯懷百姓仰稟三
方而中年以來變青彌顯天文錯亂時氣不應
斯由人怨于下譴感皇天雖朕之不明亦羣后

不能翼獎之所致也昔楚相修政洪災旋弭鄭卿勵道氛祲自消皆股肱之良用康羣變而羣公卿士各懷道迷邦拱默成敗豈所望于台輔百司哉其各上封事極言無隱於是閉鳳陽門惟元日乃開立二時於靈昌津祠天及五郊李壽以建寧上庸漢固巴徵梓潼五郡來降冬十一月虎初起河橋於靈昌津上採石為中濟石無大小下輒流去工五百餘萬而橋經年不成虎如靈昌津親閱作工遣散騎侍郎崔收沉璧

於河明日所沉之璧流于渚上波蕩上岸地震水涌樓臺殿觀莫不傾壞壓死者百餘人虎恚甚遂斬工匠罷作而還太子詹事孫珍問侍中崔約曰吾患目疾何方療之約素狎珍戲之曰溺中則愈珍曰目何可溺約曰卿目晚晚正耐溺中珍恨之以白宣宣於兄弟中最胡狀目深聞之大怒誅約父子珍遂有寵于宣頗預朝政公卿已下憚珍側目

建武十一年春正月虎子義陽公鑒鎮關中役

煩賦重失關右之和其友李松勸鑒文武有長
髮者輒拔為寇餘以給宮人長史取髮白之虎
大怒以右僕射張離為征西左長史龍驤將軍
雍州刺史察之信然徵鑿還鄴收松下廷尉以
樂平公苞代鎮長安二月發雍洛秦并州十六
萬人一作四城長安未央宮虎性好獵後體壯
大不堪乘馬跨鞍乃遣司農中郎將費霸帥工
匠四千於東平罍山造獵車千乘轅長三丈高
一丈八尺置格獸車四千乘立三級行樓二層

于其上其車使二十人昇之如今之步輦上安
徘徊曲蓋當坐處施轉關若射鳥獸直有所向
關隨身而轉虎善射矢不虛發剋期將校獵自
靈昌津南至滎陽東極陽都數千里為獵場使
御史監司其中禽獸民有犯者罪至大辟御史
因之擅作威福民有美女好牛馬者求之不得
便誣以犯獸論死者百餘家海岱河濟之間民
無寧志矣又發豫荆兗諸州二十六萬人修洛
陽宮發百姓牛二萬餘頭配朔州牧官增置內

官二十四等東宮十有二等諸公侯七十餘國
 皆為置女官九等先是大發百姓女二十已下
 十三已上萬餘人為三等之第以分配之郡縣
 要媚其旨務於美淑奪人婦者九千餘人百姓
 妻有美色豪勢因而脇之率多自殺太子及諸
 公又私令采發者亦垂一萬總會鄴宮虎臨軒
 簡第諸女大悅以使者為能封十二人皆為列
 侯自初發至鄴誅殺其夫及奪而遣之縊死者
 三千餘人荆楚楊徐之民流叛畧盡宰守坐不
 能懷綏下獄誅者五十餘人金紫光祿大夫遼
 明因侍切諫虎大怒遣龍騰拉而殺之自是朝
 臣杜口相招為祿仕而已秋八月晉豫州刺史
 路末以郡來降虎署為征西將軍屯於壽春冬
 十二月以冠軍將軍姚弋仲為持節十郡六夷
 大都督冠軍大將軍使征東將軍鄧恒將兵數
 萬屯樂安治攻具為取燕之計是歲晉梁州刺
 史桓宣伐虎將李羆軍次丹水為虎所敗

就李 項琳之
屠喬孫 同訂

後趙錄七

春秋卷第十七

魏 散騎常侍 崔 鴻 撰

石虎下

建武十二年夏五月尚書朱軌與中黃門嚴生
不協會大雨霖道路陷滯不通生因譖軌不修
道路訕謗朝政虎怒囚之寇軍將軍蒲洪諫曰
臣聞聖王之御天下也土階三尺茅茨不剪食
不累味刑措而不用亾君之馭海內也傾宮瓊
臺一作榭象箸玉杯截脛剖心脯賢剗孕故其亾

也忽焉今陛下既有襄國鄴宮足康帝宇又修
長安洛陽宮殿將何以用之盤于田游耽于女
色三代之亾恒必由此而忍爲獵車千乘環數
千里以養禽獸奪人妻女十餘萬口以盈後宮
聖帝明王之所爲固若是乎尚書朱軌納言大
臣今以道路不修將加酷法此自陛下德政失
和陰陽災沴天降霖雨七日乃霽霽方二日雖
有鬼兵百萬亦未能去道路之塗潦而況人乎
刑政如此其如史筆何其如四海何願止作徒

罷苑囿出宮女赦朱軌以副衆望虎省之不悅
憚其強直寢而不納弗之罪也爲之停長安洛
陽作役於是立私議之條偶語之律聽吏告其
君奴告其主威刑日濫公卿以下朝會具目吉
凶之間自此而絕不敢復相過從談語六月將
軍王擢擊張重華襲武衛執護軍曹權胡宣徙
七千餘戶于雍州又使涼州刺史麻秋征西將
軍張伏都一作孫攻金城太守張冲降之重華
遣中堅將軍謝艾將步騎五千來拒秋敗奔還

是年虎晝寢未安宮夢羣羊從東北負魚而來
鄴東北土高丈餘木斗滿其上寤而問佛圖澄
澄曰此不祥也鮮卑其有中原乎

建武十三年春正月虎率三公九卿躬耕籍田
於桑梓苑鄴城南地多桑梓因以築之故名桑
梓苑苑有臨漳宮三月三日及始蚕之日虎率
皇后及夫人採桑于此虎后杜氏祠先蚕於近
郊遂如襄國謁勒墓夏四月遣涼州刺史麻秋
等伐張重華以中書監石寧爲征西將軍率司

并州兵二萬餘人爲秋後繼涼將宋秦等率戶
二萬來降河湟間氐羗十餘萬落與張據相首
尾麻秋憚之不進涼別將張瑁自間道引兵截
秋軍後秋退涼將謝艾乘勝追擊將軍杜勲魚
汲死之矢軍士三千餘人秋單馬奔大夏尋與
石寧進次曲柳劉寧王擢進攻始興武街重華
使將軍牛旋楊康等來禦與寧戰于沙阜寧等
敗績引還金城秋七月虎復遣征西將軍張伏
都將軍劉渾率步騎二萬會秋等長驅濟河以

擊重華遂城長最重華大懼復遣謝艾帥衆來
拒八月戊午秋遊戰敗績退歸金城九月地震
天裂七丈又雨血于鄴城廣十餘里虎貪而無
禮既據十州之地聚斂金帛及外國所獻珍異
府庫財物不可勝紀猶自以爲不足悉發前代
帝王及先賢陵墓取其寶貨鄴邯城西石子峒
上有趙簡子墓虎令發之初得炭深丈餘次得
木板厚一尺積板厚八尺乃及泉其水清冷非
常作絞車以牛皮囊汲之月餘而水不盡不可

發而止又使掘秦始皇冢取銅柱鑄以爲噐時

沙門吳進言于虎曰胡運將衰晉當復興宜苦

役晉人以厭其氣虎使尚書張郡一作羣發近

郡男女十六萬人車十萬乘運土築華林苑及

長墻一作塘於鄴北廣長數十里又因沙門言以

五月發五百里內男女六十一作千萬人重修芳

林園至八月天暴雨雪雪深三尺大寒行旅作

役凍死者數千人太史奏作役非時天降此變

虎乃誅尚書令宋朱一作朱軌以塞天災又於華林

苑中千金堤上作兩銅龍相向吐水以注天泉池通御溝中又種名果奇花民間有名果虎作蝦蟆車四圍掘根面去一丈深一丈合土載之植之無不生又有西王母棗冬夏有葉九月生華十二月乃熟三子一尺又有羊角棗亦三子一尺勾鼻桃重二斤半春李冬花春熟安石榴子大如椀蓋其味不酸趙攬申鍾石璞等上疏言天文錯亂蒼生彫敝及因引見又面諫辭旨甚切虎大怒曰使苑墻朝成吾夕沒無恨矣促

張郡使燃燭夜作起三觀四門三門通漳水皆為鐵扉暴風大雨死者數萬人揚州獻黃鵠雛五頸長一丈聲聞十餘里泛之于玄武池中俄化為龜故或又名玄武池以此郡國前後送蒼麟十六白鹿七虎命司虞張昌柱調之以駕芝蓋大朝會列之於殿庭又鑿北城引水于芳林園城崩壓死者百餘人是時虎在鄴有一妖馬尾有燒狀入中央門出顯陽門東首東宮皆不得入走向東北俄爾不見佛圖澄聞而嘆曰災

其及矣秋九月命太子宣出祈福于山川因行
遊獵宣乘大輅羽葆華蓋建天子旌旗十有六
軍戎卒十八萬出自金明門虎於後宮升陵霄
觀望之笑曰我家父子如此自非天崩地陷當
復何愁但抱子弄孫日爲樂爾宣馳逐終夕所
在陳列行宮四面各以百里爲度驅圍禽獸至
暮皆集行宮文武跪立圍中壺行烽炬星羅光
燭如晝命勁騎百餘馳射其中宣與嬖姬顯德
美人乘輜車一作輦臨觀嬉娛忘反獸盡而止或

獸有屏

一作逆又作奔

逸當坐守者有爵則奪馬步驅

一日無爵則鞭之一百峻制嚴刑文武戰慄士

卒饑凍死者萬有餘人宣弓馬衣食皆號爲御

有亂其間者以冒禁罪罪之所過三州十五郡

資儲皆無子遺虎復命秦公韜出自并州遊於

秦雍亦如之宣數惡韜秉政終有代已之意是

行也嫉之彌甚宦者趙生得幸于宣而無寵于

韜微勸宣除之於是相圖之計起矣冬十月麻

秋又襲張重華將張瑁於河陝敗之斬首三千

餘級枹罕護軍李達率衆七千來降自河以南
氏羗始皆來附

建武十四年夏四月秦公韜有寵于虎欲立之
以太子宣長猶豫未決宣嘗忤旨虎怒曰悔不
立韜也韜由是益驕五月熒惑入婁犯填星占
者以爲災在趙兵大起國有喪六月韜起堂於
太尉府號曰宣光殿梁長九丈宣見之大怒斬
匠截梁而去韜怒增之至十丈宣聞之恚甚謂
所幸力士鉅鹿楊杯及牟皮牟成趙生等曰韜

凶豎勃逆敢違我如是汝等能殺之者吾西入
宮當盡以韜之國邑分封汝等韜死主上必親
臨喪吾因行大事無不濟矣杯等許諾秋七月
宣將殺韜乃先詣寺與佛圖澄同坐塔上一鈴
獨鳴澄謂宣曰解鈴音乎鈴云胡子洛度宣變
色曰是何言歟澄謬曰老胡爲道不能山居無
言重茵美服豈非洛度乎及韜後至澄熟視良
久韜懼而問澄澄曰怪公血臭故相視爾虎夢
龍飛西南自天落地旦而召澄問之澄曰脇下

有賊不出十日自浮屠以西此殿以東當有血流慎勿東行杜后曰和尚耄耶何處有賊澄易語云六情所受悉皆是賊耄但使少者不憚憚卽好爾自此以後澄便寓言不復彰顯八月社日東南有黃黑雲大如數畝稍分爲三狀若匹布東西經天色黑而青西時貫日日沒後分爲七道每相去數十丈間有白雲如魚鱗子時乃滅韜素解天文見而惡之顧謂左右曰此變不小當有刺客起于京師不知誰定當之是夜韜

與僚屬讌於東明觀樂奏酒酣愀然長嘆曰人居世無常別易會難各付一杯開意爲吾飲令必醉知後會復何期而不飲乎因泫然流涕左右莫不欷歔因宿于佛寺中宣遣楊杯牟皮牟成趙生等十餘人夜緣獼猴梯而入斫殺韜於精舍置其刀箭而去旦日宣奏之虎哀驚氣絕久之方蘇將出臨其喪司空李農諫曰害秦公者未知何人恐在蕭牆之內慮生非常鑿輿不宜輕出虎以佛圖澄先誠乃止遂嚴兵發哀于

大武殿宣乘素車從千人往臨韜喪不哭直言
呵呵使舉衾觀尸大笑而去收大將軍記室參
軍鄭靖尹武等將委之以罪虎疑宣殺韜欲召
之懼其不入乃詐言其母杜氏哀過危憊宣不
謂見疑入朝中宮因而留之建興人史科知其
謀告稱韜死夜宿東宮長上楊杯家杯夜與五
人從外來相與語曰大事已定但願大家老壽
吾等何患不富貴語訖便入科寢閣中杯不見
也科尋出逃匿俄而杯與二人出求科不得杯

曰宿客聞人向語當殺之斷口舌今而得去作

大事矣

一云敗乃事矣

科踰墻獲免虎馳使收楊杯牟

皮趙生等杯皮皆亾去執趙生詰之生具首服

虎悲怒彌甚幽宣于席庫以鐵環穿其頷而鑊
之作數斗木槽和以羹飯以猪狗法令食之取
殺韜刀箭砥其上血哀號之聲震動宮殿佛圖
澄諫曰宣韜皆陛下之子今爲韜殺宣是重禍
也陛下若含怒加慈者福祚猶長尚有六十餘
歲如必誅之宣當爲彗星下掃鄴宮也虎不從

乃積柴於鄴北樹標其上標末置轆轤穿之以繩倚梯柴積送宣于標所使韜所幸宦者郝稚劉霸拔其髮抽其舌牽之登梯上於柴積郝稚以繩貫其領轆轤絞上劉霸斷其手足斫眼潰腹如韜之傷四面縱火烟炎際天虎築中臺從昭儀已下數千人登中臺以觀之火滅取灰分置諸門交道中殺其妻子二十九人宣少子年纔數歲虎素愛之抱之而泣見曰非兒罪虎欲赦之大臣不聽遂於抱中取而殺之兒視虎衣

大叫至於帶絕時人莫不爲之流涕虎因此發病廢其母杜氏爲庶人誅其四率已下三百人宦者五十人皆車裂節解棄之漳水洿其東宮以養猪牛東宮衛士十餘萬人皆謫戍涼州先是散騎常侍趙攬言于虎曰中宮將有變宜防之及宣殺韜虎疑其知而不告亦誅之貴嬪柳氏尚書者之女也以才色特幸坐其二兄有寵於宣亦殺之虎追念其姿色復納者少女於芳林園九月虎議立太子太尉張舉曰燕公斌彭

城公遵竝有武藝文德陛下神齒已衰四海未
一請擇二公而樹之虎曰卿言正合吾意戎昭
將軍張豺曰燕公母賤又嘗有過彭城公母前
以太子事廢之今復立之恐不能無微恨陛下
宜審思之初虎之破上邽也張豺獲劉曜幼女
安定公主年十二有殊色納于虎虎嬖之生子
世封齊公豺以虎年長多疾欲立世為嗣冀劉
氏為太后已得輔政乃說虎曰陛下再立儲宮
其母皆出自娼賤故禍亂相尋今宜擇母貴子

老者立之虎曰卿且勿言吾知太子處矣虎再
與羣臣議於東堂曰吾欲以純灰三斛自滌其
腸何為專生惡子兒年二十餘輒欲殺公今世
方十歲比其二十吾已老矣乃與張舉李農定
議勅公卿上疏請立世為太子大司農曹莫不
肯署名虎使張豺問其故莫頓首曰天下重器
不宜立少故不敢署虎曰莫忠臣也然未達朕
意張舉李農知吾意矣可令諭之遂立世為皇
太子以昭儀為皇后召太常條攸光祿勳杜叡

謂之曰煩卿傳太子實希改轍吾之相託卿宣
明之署攸為太傅嘏為少傅冬十月虎使符健
寇竟陵十一月享羣臣於太武前殿佛圖澄殿
上褰衣而行吟曰殿乎殿乎棘子成林將壞人
衣虎令發石下而視之有棘子生焉冉閔小字棘奴故澄
言及十二月辛巳大雨霖虎問佛圖澄澄曰其
為我乎至戊子而澄卒是年造刀一口長五尺
銘曰皇帝石氏隸書

太寧元年春正月虎疾瘳遂以晉永和五年僭

即皇帝位於南郊大赦境內改元太寧百官增
位一等諸子進爵為王以尚書張良為右僕射
故東宮高力等萬餘人謫戍涼州行達雍城不
在赦例勅雍州刺史張茂送之茂皆奪其馬使
之步推鹿車致糧戍所高力督定陽梁犢等因
眾心之怨謀起兵東還陰令胡人頡獨鹿微告
戍者戍者皆踴躍大呼犢乃自稱晉征東大將
軍率眾攻拔下辨逼張茂為大都督大司馬載
以輅車安西將軍劉寧自安定擊之為犢所敗

秦雍間城戍無不摧陷斬二千石長史長驅而
東高力等皆多力善射一以當十雖無兵甲所
在掠民斧施一丈柯攻戰若神所向奔潰戍率
皆隨之比至長安衆已十萬樂平王苞時鎮長
安盡銳拒之一戰而敗犢遂東出潼關進趣洛
陽虎遣李農爲大都督行大將軍事統衛軍將
軍張賀度征西將軍張良征虜將軍石閔等率
步騎十萬討之戰于新安農等大敗又戰于洛
陽又敗退壁成臯犢遂東掠滎陽陳留諸郡虎

大懼以燕王斌爲大都督督中外諸軍事帥精
騎一萬統冠軍大將軍姚弋仲車騎將軍蒲洪
等討之弋仲將輕騎八千餘人至鄴求見虎時
寢疾未之見也引入領軍省賜以已所御食弋
仲怒曰國家有賊召我擊之官當見我面授方
略破賊而以食食我我來覓食耶且主上不見
我我何以知其存亾也欲引還虎力疾見之弋
仲讓虎曰兒死愁耶何爲而病兒幼時不擇善
人教之使至于爲逆旣爲逆而誅之又何愁焉

且汝久病所立幼兒汝若不愈天下必亂當先
憂此勿憂賊也犢等窮困思歸相聚爲盜所過
殘暴何所能至老羗爲汝一舉了之弋仲性狷
直人無貴賤皆汝之虎亦不之責於坐授使持
節征西大將軍賜以鎧馬弋仲曰汝看老羗堪
破賊否乃被鎧跨馬于中庭因策馬南馳不辭
而出遂與斌等擊犢于滎陽大破之斬犢首而
還盡滅其餘黨虎命弋仲履劍上殿入朝不趨
進封平西郡公蒲洪爲侍中車騎大將軍開府

儀同三司都督秦雍州諸軍事雍州刺史進封
略陽郡公二月晉征北大將軍褚裒使部將王
龕來伐拔其沛郡獲將軍支重始平人馬昂起
兵于洛氏葛谷自稱將軍樂平王苞攻滅之誅
三千餘家熒惑犯積尸又犯昴月熒惑北犯河
鼓洛陽一作濟陽城西北九里石牛在青山硤上夜
忽鳴喚聲聞三十里遣人打落兩耳及尾以鐵
釘釘四脚夏四月乙卯虎病甚以彭城王遵爲
大將軍鎮關右燕王斌爲丞相錄尚書事張豺

爲鎮衛大將軍領軍將軍吏部尚書並受遺詔
輔政劉后惡斌輔政恐不利于太子與張豺謀
去之矯詔稱斌無忠孝之心免官歸第尋復使
豺弟雄矯詔殺之乙丑彭城王遵自幽州至鄴
勅朝堂受拜配禁兵三萬遣之遵涕泣而去是
日虎疾小瘳問遵至未左右答曰去已久矣虎
曰恨不見之虎臨西閣龍騰中郎三百餘人列
拜于前虎曰何所求也皆曰聖體不安宜令燕
王入宿衛典禁兵一作兵馬或言乞以爲皇太子虎

不知斌之已廢責曰燕王不在內耶呼來左右
言王酒病不能入虎曰促持輦迎之當付璽綬
亦竟無行者尋惛眩而入戊辰劉后矯詔以
爲太保都督中外諸軍錄尚書事加千兵百騎
如霍光輔漢故事侍中徐統嘆曰禍將作矣吾
無爲豫之仰藥而死已已虎薨於金華殿及遵
僭立葬於顯原陵僞諡武皇帝廟號太祖虎以
晉咸康元年僭位至晉太和五年死在位十五
年

就李 項蘇之 同訂

言王西赤不銷入與曰與林葦吸之當林葦
亦味無之已劉責曰燕王不林內明和來去亦



